

"Bumiputera perlu konsortium edar produk

Oleh Mohd Hamizar Hamid

PUTRAJAYA: Usahawan Bumiputera perlu mengatasi beberapa kelemahan, terutama kegagalan menguasai rantai nilai, kualiti produk yang rendah, dan pengurusan tidak cekap, untuk maju dalam perniagaan.

Menteri Pembangunan Usahawan dan Koperasi, Datuk Mohamad Khaled Nordin, berkata kelemahan itu boleh diatasi menerusi penubuhan konsortium atau gerakan koperasi.

"Sebagai contoh, rangkaian pasar mini DMart dan kedai runcit usahawan Mara di kampung yang masih menjalankan perniagaan dan mendapatkan bekalan secara bersendirian, sama ada daripada peruncit lebih besar atau pemborong bukan Bumiputera.

"Justeru, adalah wajar pasar raya pemborong milik Bumiputera diwujudkan sama ada melalui konsortium atau gerakan koperasi bagi mendapat bekalan pada harga lebih kompetitif," katanya membentangkan kertas kerja bertajuk 'Keusahawanan Cabaran Kepada Peneroka di Era 50 tahun Kedua Felda' pada Sambutan Jubli Emas Hari Peneroka 2007 di Pusat


BM 81712007
Konvensyen Antarabangsa Putrajaya (PICC) di sini, semalam.

Mohamad Khaled berkata, usahawan Bumiputera juga mudah berpuas hati dengan produk masing-masing tanpa memikirkan pengubahsuaian, kualiti pembungkusan dan promosi bagi meningkatkan jualan.

"Selain itu, kelemahan turut berlaku dalam aktiviti pengedaran. Sepatutnya lebih ramai usahawan dalam bidang pengedaran diwujudkan bagi membolehkan produk Bumiputera dipasarkan secara lebih konsisten dan meluas," katanya.

Sehubungan itu, Mohamad Khaled berkata, Kementerian Pembangunan Usahawan dan Koperasi (MECD) serta Felda mengadakan program pembangunan usahawan seperti menggerakkan koperasi bagi meningkatkan keupayaan rantai nilai, termasuk dalam aspek pembekalan produk, pengurusan ladang dan pemasaran.

"Masyarakat Felda kini dibawa melalui proses pembudayaan keusahawanan menerusi program Institut Keusahawanan Negara dan Mara serta pemasaran antarabangsa dengan satu jenama Felda," katanya.



RANCANG PEMBANGUNAN: Khaled (kanan) dan Pengerusi Felda, Tan Sri Dr Mohd Yusof Noor pada majlis Sambutan Jubli Emas Hari Peneroka 2007 di Pusat Konvensyen Antarabangsa Putrajaya (PICC) di Putrajaya, semalam.